



Sesida dals

Communitgà ils

Protocol nr.

22 d'avrigl 2025

23 d'avrigl 2025

302/2025

Dumonda Degiacomi

concernent la situaziun d'abitar da persunas cun malsognas da dependenza

Resposta da la Regenza

Tar la dumonda 1: Cun il conclus dals 29 d'avrigl 2024 (prot. nr. 380/2024) ha la Regenza incumbensà l'uniun Oase da realisar il project da pilot «Housing First». La finamira è quella da metter a disposiziun ina purschida da basa per tschintg persunas a partir da l'avust 2024 fin il december 2025. La fin da mars 2025 faschevan sis persunas diever da la purschida.

Las experientschas èn fin ussa per gronda part positivas: Nagin dals utilisaders n'ha stuì interromper la purschida u è returnà ad ina situaziun senza abitaziun/suttetg. Anzi, la situaziun da vita da las persunas pertutgadas è sa stabilisada e sa meglierada.

Tar la dumonda 2: L'augment dal dumber da persunas senza abitaziun/suttetg è d'attribuir a plirs facturs. Spezialmain relevants èn la disponibladad limitada da spazi d'abitar pajabel sco er obstachels supplementars, sco entradas minimalas, debits, problems da sanadad u l'exclusiun dal martgà d'abitaziuns dapi blers onns. Tar persunas dependentas da drogas sa preschantan questas cundiziuns disfavraivlas savens a medem temp. Uschia è lur situaziun da partenza spezialmain disfavraivla, sche la purschida da spazi d'abitar pajabel è magra.

Il project da pilot «Housing First» sa drizza sistematicamain a persunas ch'èn gia daditg senza abitaziun e che han ina dependenza da drogas e/u ina malsogna psichica. Cun questa purschida metta la Regenza a disposiziun in sustegn direct. Betg mintga persuna senza situaziun d'abitar reglada n'è però adattada u averta per ina tala purschida.

Tenor stimaziuns da las personas specialisadas vegnan actualmain circa diesch personas da la gruppa pertutgada en dumonda per la purschida da «Housing First». Ina cumpart sumeglianta pudess profitar da l'abitar assistì, entant ch'ina ulteriura part dastgass esser en cas da viver senza sustegn supplementar en in'atgna abitaziun. Ina cumpart pli pitschna da var tschintg personas tutga tar la categoria dals uschenumnads «heavy users» u «persunas betg integrablas en il sistem». Per els n'exista actualmain nagina furma da sustegn adattada, resp. las personas pertutgadas n'acceptan u na pon acceptar naginas furmas da sustegn adattadas.

Tar la dumonda 3: La Regenza vegn ad evaluar il project da pilot «Housing First» ed ad examinar, sch'i vegn en dumonda – sin basa da las experientschas – da prolungar e d'extender il project sin ulteriuras personas. En il rom da la meglieraziun successiva da l'agid simpel per personas dependentas vegni a medem temp evaluà, tge influenza ch'il nov post da contact e da consultaziun, che dispona d'ina purschida extendida e che vegn finanzià dal chantun, ha sin la situaziun da vita da personas senza abitaziun. En quest context vegni examinà, sche ed en tge furma che la purschida da l'abitar assistì duai vegnir extendida.



En num da la Regenza

Il president:

Marcus Caduff

Il chancelier:

Daniel Spadin